

## **Na Letasi nigna a Pol vanira na komi Tinoni Kiloau i Filipai**

### *Na Titiono Eigna Na Letasi Iaani*

Filipai sina meleha hutu kori provins i Masedonia, mi mara Rom kena vunaghi pungusia. Filipai na meleha kori kandre nidia mara Grik ke kidi jufu itagna na mane vetula a Pol bali titiono na Rorongo ke Toke (Reghia Tango 16:11-40). Kori vido a Pol ke risoa na letasi iaani, imanea ke mono kori vathe tatari i Rom.

Pol ke risoa na letasi iaani eigna ke magnahaghinia na komi tinoni Filipai eigna kedana adoa imanea ke totogo puala eigna na rongo sosoni kena vetula itagna bali hathea. Ma Pol ke magnahaghinia na veleragna eigna kedana sokara ngasi kori nidia na vaututuni gi keda padara na komi thagi papara ke pada ghohi imanea.

Pol ke velera mua eigna kedana reireghira ghehedia tagna na velepuhi piapilau. Kekeha tinoni Jiu kena velera na komi tinoni kiloau i Filipai, gi kedana magnahaghinia na mono jino kori matagna a God, imarea kedana leghua na komi vetula nigna Moses mena sogivaughithatha. Keana a Pol ke velera eigna kedana sokara ngasi vamua kori na dotho nigna a God ke hutu vanira, ma na vunegna kena vaututunia Jisas, imarea kena mono haidu toetoke duagna. E

boi tutuni imarea kedana leghua na komi vetula nidia mara Jiu.

Sina fata ke nagho ke titionoa a Pol kori letasi iaani, na puhi bali mono totogo hahali. Pol ke velea na vunegna ke mono haidu toetoke duagna a Krai, imanea ke tangomana na mono totogo tadia na komi fata gougovu ke pada kori havigna.

**Na komi fata ke nagho kori letasi iaani:**

Pol ke titiono eigna na monoagna kori vathe tatari (1:1-30)

Krai ke tateli aua toetoke na puhi bali mono taluleghu (2:1-2:18)

Na rorongong eidia Timoti ma Epafrodaitus (2:19-30)

Na voututuni tagna a Jisas vamua ke vajinoa na tinoni kori matagna a God (3:1-4:9)

Pol ke totogo eidia na komi tinoni kiloau i Filipai (4:10-23)

<sup>1</sup> Inau a Pol duagu a Timoti, roghami rua na mane agutu nigna a Jisas Krai. Roghami kuru riso atua na letasi iaani itamiu ighamu na komi tinoni nigna a God koti voututunia a Jisas Krai koti mono kori meleha hutu i Filipai. Roghami kuru risoa vanira arahai kena batughamu ma arahai kena haehathe kori agutu kiloau. <sup>2</sup> Roghami kuru tarai gi a God a Tamada ma nida a Lod Jisas Krai koroda vatokeghamu mo koroda hatheghamu eigna kotida mono kori soleana.

*Nigna Tarai A Pol*

<sup>3</sup> Tagna na komi maghavu inau ku toghaghamu, inau ku veletokea a God. <sup>4</sup> Mi

tagna na komi maghavu ku tarai eimiu ighamu, inau ku totogo puala <sup>5</sup> eigna koti hatheu kori tuturiagna na Rorongo ke Toke, turughu kori vido koti vaututunia a Jisas Kraiss me jufu ikeagaieni. <sup>6</sup> Kori vido koti vaututunia a God, imanea ke turughua na agutu ke toke kori havimiu. Mu pukuni adoa imanea keda talu hatheghamu me ghieghilei govu na agutu iangeni kori dani keda tabiru mai a Jisas Kraiss.

<sup>7</sup> E nabagu puala kuda totogo mu veletokea God eimiu ghamu, eigna inau ku dothovighamu moti hatheu kori agutu a God ke heu mai. Hii, ighamu koti hatheu kori vido ku mono kori vathe tatari mi kori vido ku titionoa na Rorongo ke Toke mu tatelia vanira na komi tinoni na Rorongo ke Toke ke tutuni. <sup>8</sup> Inau ku toghaghamu hahali eigna ku dothovighamu puala vaghagna a Jisas Kraiss ke dothovighamu. A God ke adoa iaani boi na haghore piapilau.

<sup>9</sup> Inau ku tarai gi nimiu na dotho keda hutu vano. Mu tarai gi ighamu kotida pukuni adoa a God moti tangomana na fateagna na puhi ke toke meke dika <sup>10</sup> eigna kotida tangomana na vahiagna na puhi ke toke. Inau ku eia na tarai iaani eigna kotida jino moti boi eia sa fata ke dika turughu ikeagaieni me jufu na dani a Kraiss keda tabiru mai. <sup>11</sup> Inau ku tarai gi a Jisas Kraiss keda hatheghamu eigna kotida eia na komi fata ke toke. Gi na komi tinoni kedana kilothaba mena ghaghana bohea a God eigna imarea kena reghia na puhimiu ke toke.

*Na Havi Ke Tutuni*

<sup>12</sup> Ighamu ara kulagu kiloau, inau ku magnahaghinighamu kotida adoa na mono tatari ku eia ikeagaieni ke hatheu kori tuturi auagna na Rorongo ke Toke. <sup>13</sup> Mara na soldia kena reireghia na vathegna na king, me sethe na tinoni kori meleha iaani, kena adoa ghohi inau ku mono kori vathe tatari eigna ku agutu vania a Kraiss. <sup>14</sup> Sethe na komi tinoni kiloau ikeagaieni kena boi mataghu na titionoagna na haghoregna a God vanira arahai kena boi vaututuni. Imarea kena boi mataghu eigna kena adoa a Lod ke hatheu kori vido ku mono kori vathe tatari mena vaututunia a God keda hathera mua.

<sup>15-17</sup> Kekeha tinoni kena titionoa Jisas Kraiss eigna imarea kena magnahaghinia na eiagna na fata ke jino. Imarea kena titionoa eigna kena dothoviu inau mena adoa a God ke vahiu eigna kuda titionoa vanira na komi tinoni na Rorongo ke Toke ke tutuni. Keana kekeha tinoni kena titionoa Kraiss eigna kena tahotha eigu inau mena boi magnahaghinia na komi tinoni kedana leghuu inau. Na ghaghanadia bali titionoa na Rorongo ke Toke e boi jino. Imarea kena magnahaghinia vamua eigna kedana naghoi tagua. Imarea kena eia iangeni eigna kena magnahaghiniu inau kuda dikahehe mu papara kori vido ku mono kori vathe tatari.

<sup>18</sup> Keana, gi kedana titionoa a Kraiss kori ghaghana ke jino ba ke boi jino, e toke vamua. Eigna na fata ke nagho, imarea kena titionoa vamua na Rorongo ke Toke eigna a Kraiss. Ma na vunegna iangeni, inau ku totogo puala.

Me teo keda govu nigua na totogo, <sup>19</sup> eigna

inau ku adoa nimiu na tarai eigu inau ma na haehathe nigna na Tarungagna a Jisas Kraiss keda vamamaluhau kori vathe tatari. <sup>20</sup> Inau ku magnahaghinia mu vaututunia inau kuda boi eia sa fata keda vamaomamou kori matagna a God. Turughu i hau me jufu ikeagaieni, inau ku boi mataghu na titionoagna a Kraiss mu bos magnahaghinia gi kuda mataghu. Gi kuda talu havi ba gi kuda thehe, inau ku magnahaghinira na komi tinoni gi kedana veletokea a Kraiss eigna na komi fata ku eia. <sup>21</sup> Nigua na toatogha inau vaghagna iaani; Gi kuda talu havi, inau ku magnahaghinia vamua kuda ghaghana bohea a Kraiss. Gi kuda thehe, e toke vano vamua eigna inau kuda mono duagna a Kraiss. <sup>22</sup> Keana, gi kuda talu havi nigua mua, inau tangomana kuda ei vania a Kraiss na agutu ke sethe. Mu hahi nigua ivei tadia kuda vahia. Na havi ba na thehe. <sup>23</sup> Me vahotha puala ivei kuda leghua tadia e rua na ghaghana iraani. Inau ku magnahaghinia kuda vano mono duagna a Kraiss i popo eigna iangeni hiri ke toke vano kori mono ku eia kori maramagna. <sup>24</sup> Keana, e haluhadi vano kuda talu mono eeni eigna kuda hatheghamu. <sup>25</sup> Ma na vunegna iaani, inau ku adoa kuda talu mono duamiu eigna kuda hatheghamu na vahetagna nimiu na vaututuni tagna a Kraiss. Kori vido ighamu kotida sokara ngasi kori nimiu na vaututuni, ighamu kotida totogo. <sup>26</sup> Kori vido kuda ghoi tabiru atu itamiu, ighamu kotida pukuni veletokea a Jisas Kraiss eigna na komi fata imanea ke eia vaniu.

<sup>27</sup> Keana, na fata ke nagho vano: ighamu

kotida leghua na puhi ke nabadia arahai kena voututunia na Rorongo ke Toke eigna a Krai. Gi inau kuda atu jufungighamu ba teo, oti eia iaani eigna kuda rongovia ighamu koti sokara ngasi tagna sina ghaghana, moti sakai agutu bali hathera na komi tinoni eigna kedana voututunia na Rorongo ke Toke. <sup>28</sup> Saghoi mataghunira arahai kena thevuioka itamiu. Gi kotida boi mataghunira, imarea kedana adoa a God keda vetulara vano kori meleha papara, keana imanea keda vahavighamu. <sup>29</sup> Ighamu koti adoa a God ke vahighamu eigna kotida voututunia a Krai, me boi iangeni vamua. Imanea keda lubatighamu eigna kotida papara eigna imanea. <sup>30</sup> Kori vido ku mono duamiu, ighamu koti adoa inau ku papara eigna ku leghua a Krai. Moti adoa mua ikeagaieni inau ku papara kori vathe tatari. Mi ighamu koti papara mua eigna ighamu koti leghua a Krai.

## 2

### *Leghua Na Puhigna A Krai*

<sup>1</sup> A Krai ke vaheta na ghaghanamiu eigna ighamu nigna na komi tinoni ma nigna na dotho ke vasulaghamu. Na Tarunga ke Tabu ke mono haidu duamiu ma a Krai ke rarovighamu me hatheghamu. <sup>2</sup> Na vunegna na komi fata iraani ke tutuni, oti vatotogou kori eiagna na hava kuda kaeghamu ikeagaieni. Inau ku magna-haghinighamu kotida mono veidothovighi moti leghua vamua sina ghaghana. <sup>3</sup> Oti saghoi gumao moti saghoi tautalunagho. Keana, oti mono

taluleghu moti ghaghanara arahai tavogha kena nagho itamiu. <sup>4</sup> Saghoi toatogha vamua na komi fata koti magnahaghinia na eiagna, keana oti toatogha na komi fata arahai tavogha kena magnahaghinia na eiagna moti hathera. <sup>5</sup> Kori na havimiu oti leghua vamua na ghaghanagna a Jisas Krai:

<sup>6</sup> Toke a Jisas Krai ke nanaba duagna a God, imanea ke boi sokara ngasi tagna na ghaghana keda talu mono nanaba duagna.

<sup>7</sup> Keana imanea ke talu horua nigna na mana ma na silada,  
me havi mai kori tonogna na tinoni,  
me leghua na puhigna na mane ke agutu vanira arahai tavogha.

<sup>8</sup> Imanea ke mono taluleghu me leghua a God thovohaliu.  
Toke imanea keda thehe kori ghaibabala vaghagna na tinoni dika, imanea ke talu leghua vamua a God.

<sup>9</sup> Na vunegna iaani, a God ke vahaihadia me hea na aha ke nagho vano tadia na komi aha gougovu.

<sup>10</sup> A God ke eia iangeni eigna na komi tinoni gougovu kedana torongaghi tuturu tagna a Jisas; arahai kena mono i popo, ma arahai kena mono kori maramagna, ma arahai kena thehe ghohi.

<sup>11</sup> Imarea gougovu kedana tuturi aua a Jisas Krai, imanea a Lod me kedana veletokea a God a Tamada.

*Eia Na Hava Ke Magnahaghinia A God*

<sup>12</sup> Ara kulagu ku dothovighamu, ighamu koti leghua hahali a God kori vido ku mono duamiu.

Keana ikeagaieni, kori vido inau ku mono haunighamu, ighamu kotida talu leghua. Me toke gi kotida agutu hutu kori mataghu bali eia na komi fata ke nabadia na komi tinoni a God ke vahavira. <sup>13</sup> Ighamu tangomana kotida eia na komi fata iraani eigna a God ke agutu kori havimiu me vasasaaghamu na eiagna na hava ke magnahaghinia me hatheghamu na eiagna.

<sup>14</sup> Tagna na komi fata gougovu koti eia, oti saghoi rihu haohaghore ba ngungu eigna sa fata koti bosu magnahaghinia na eiagna. <sup>15</sup> Oti saghoi eia iraani eigna kotida mono jino me teo ahai keda tangomana na veleagna sa fata ke dika eimiu. Kori maramagna iaani, ighamu koti mono duadia na komi tinoni kena leghua na komi puhi ke dika, keana ighamu kotida mono jino eigna ighamu ara dathegna a God. Na havimiu keda raraha itadia vaghagna na vaitughu ke raraha kori bongi, <sup>16</sup> eigna ighamu koti titiono aua itadia na Rorongo ke Toke eigna na havi ke teo na govugna. Gi kotida talu eia iaani, inau kuda totogo nigua puala eimiu ighamu kori vido a Krai keda ghoi tabiru mai. Eigna inau kuda adoa ku bosu hai agutu itamiu.

<sup>17</sup> Nimiu na agutu vania a Krai ma na nimiu na vaututuni ke vaghagna na havughaghi ighamu koti ei vania a God. Gi a God ke magnahaghinia inau kuda thehe, na havigu keda vaghagna na havughaghi kena talu haidua duagna nimiu na havughaghi. Gi keda agai, inau kuda totogo vaghagna ighamu koti totogo eigna na havughaghi koti eia. <sup>18</sup> Vaghagna mua, ighamu kotida totogo duagu.



*Timoti Ma Epafroditus*

<sup>19</sup> Gi keda lubatiu a Lod Jisas, boi hau mu vetula atua a Timoti itamiu. Kori vido imanea keda tabiru mai itagua, imanea keda titiono vaniu na rorongomiu bali vatotogou. <sup>20</sup> Teo mua ahai ke mono duagu keda dothovighamu vaghagna a Timoti. Imanea ke pukuni magnahaghinia na adoagna ighamu koti mono toke kori havimiu ba teo. <sup>21</sup> Imanea ke boi vaghadia na komi tinoni kena toatoghara vamua na komi fata kena magnahaghinia ghehedia, boi na fata ke magnahaghinia a Jisas Kraiss. <sup>22</sup> Ighamu koti adoa ghohi na puhigna a Timoti ke toke eigna imanea ke agutu duagu kori tuturiagna na Rorongo ke Toke. Imanea ke vaghagna vamua na gari ke agutu duagna a tamagna. <sup>23</sup> Kori vido inau ku adoa na hava keda padau eeni, inau ku magnahaghinia na vetulagna atua a Timoti itamiu. <sup>24</sup> Kori nigua na vaututuni, e boi hau a Lod keda lubatiu na ghoi atu sighoghamuagna.

<sup>25</sup> Keana, inau ku ghaghana gi kuda kidi vetula tabiru atua itamiu a kulada kori vaututuni, a Epafroditus, na mane ighamu koti vetula maia itagua i hau bali hatheu. Iroghami kuru tango haidu muru sokara pungusira na komi tinoni kena boi magnahaghinia na Rorongo ke Toke. <sup>26</sup> Epafroditus ke magnahaghinia puala keda ghoi atu reghighamu. Imanea ke dikahehegna puala eigna ke adoa ighamu koti rongovia imanea ke vahaghi hutu. <sup>27</sup> Tutuni puala, imanea ke vahaghi hutu puala me haga thehe. Keana a God ke raroivia imanea, me raroiviu inau mua, eigna a God ke boi magnahaghiniu kuda

dikahehe vano tagna na dikahehe ke kidi mono ghohi itagua. <sup>28</sup> Mu magnahaghinia puala kuda vetula tabirua atu itamiu, eigna kotida totogo kori reghiagna. Na ghaghanagu keda mamaluha eigna inau kuda adoa ighamu koti totogo. <sup>29</sup> Kori vido keda atu jufu itamiu, oti hatia kori totogo, eigna imanea a kulamiu kori vaututuniagna a Lod. Moti ghaghana bohera mua arahai kena vaghagna imanea, <sup>30</sup> eigna ke haga thehe kori vido ke agutu vania a Krai. Epafroditus ke boi toatogha na havigna, kari imanea ke sasaa na eiagna vaniu na komi fata ighamu koti boi tangomana na eiagna vaniu eigna ighamu koti mono hauniu.

### 3

#### *Na Pui Ke Magnahaghinia A God*

<sup>1</sup> Ara kulagu kiloau, inau ku magnahaghinighamu kotida totogo eigna ighamu nigna na komi tinoni a Lod. Inau ku risoa vanighamu ghohi na komi fata iraani, keana e toke vamua itagua kuda ghoi riso atua itamiu. Eigna na komi fata iraani keda hatheghamu eigna kotida sokara ngasi kori nimiu na vaututuni.

<sup>2</sup> Reireghi toke ghamu tadia arahai kena velea gi ahai ke magnahaghinia keda nigna na tinoni a God, imanea keda sogivaughithatha. Iaani e boi tutuni. Imarea kena velepuhi vaghagna iaani ena dika. Mena vaghadia mara na bongihehe. <sup>3</sup> Ighita na pukuni tinoni nigna a God, bosu imarea, eigna ighita kati hatia ghohi na Tarunga

ke Tabu eigna keda hatheghita kori maimanihi-agna a God. Mati totogo eigna na komi fata ke eia a Jisas Krai vanighita. Ighita ati boi voututunira na komi fata kati eia gheheda bali hatiagna na havi ke teo na govugna.

<sup>4</sup> Gi keda hatheghita na komi fata kati eia gheheda, inau tangomana kuda voututuni tadia na komi fata ku eia ghehegu. Eigna na komi fata ke toke inau ku eia ghehegu e sethe vano tadia na komi fata ke toke kena eia arahai tavogha.

<sup>5</sup> Inau na mane Jiu eigna inau na vinahuhugna a Benjamin. Na vunegna ara hutugu kena Jiu, inau na pukuni mane Jiu. Alu na dani leghugna ku havi mai, imarea kena sogivaughithathau. Na vunegna inau na mane Farise,\* inau ku pukuni leghua na komi vetula nimami ghami mara Jiu.

<sup>6</sup> Na vunegna inau ku pukuni magnahaghinia na komi vetula irangeni, inau ku riurihura arahai kena leghua a Krai. Inau ku pukuni jino kori leghuagna na komi vetula me teo ahai ke velea inau ku boi pukuni leghura.

<sup>7</sup> I hau, inau ku ghaghana na komi fata iraani tangomana keda hatheu. Keana, ikeagaieni inau ku adoa na komi fata iraani boi tangomana keda hatheu eigna inau ku adoa na hava ke eia vaniu a Krai. <sup>8</sup> E tutuni! Kori ghaghanagu na komi fata ku eia i hau boi tangomana keda hatheu. Mu adoa na pukuni naghoi fata na ado tokeagna vamua na nigua Lod, Jisas Krai. Ma na vunegna inau ku magnahaghinia vamua na adoagna a Krai, inau ku togha sanira na komi

---

\* **3:5** “Farise” Reghia kori Diksonari

fata iraani. Inau ku toatogha na komi fata iraani vaghagna na saosaghoma vamua, eigna <sup>9</sup> inau ku magnahaghinia kuda mono totho itagna a Krai. Inau ku jino kori matagna a God boi eigna inau ku leghua na komi vetula nidia mara Jiu. Teo, inau ku jino kori matagna a God eigna inau ku voututunia a Krai vamua. <sup>10</sup> Na fata ku magnahaghinia, na ado tokeagna a Krai vamua. Mu magnahaghinia mua a Krai keda agutu korai havigu kori mana a God ke hea kori vido imanea ke sokara tabiru kori thehe. Inau ku magnahaghinia gi kuda papara vaghagna a Jisas ke papara. Mu magnahaghinia mua kuda thehe eigna a Jisas vaghagna vamua imanea ke thehe eigu inau. <sup>11</sup> Inau ku magnahaghinia kuda eia na komi fata iraani eigna a God keda vasokara tabiruu leghugna kuda thehe.

### *Agutu Heta Bali Hatia Na Taba*

<sup>12</sup> Inau u boi velea ku pukuni adoa ghohi a Jisas Krai, ba inau ku pukuni jino ghohi. Teo. Keana inau ku agutu heta eigna kuda adoa a Jisas Krai mu mono jino, eigna a Krai Jisas ke vahiu eigna kuda eia na komi fata iraani. <sup>13</sup> Ara kulagu kiloau, inau u bosu velea inau ku eia ghohi na komi fata iraani. Kari na puhi ku eia ke vaghagna na tinoni ke raghe veuehuhu. Inau kuda togha sania na komi fata gougovu i leghugu, mu hatia na hetagu eigna kuda jufungia na vido ku boi jufungia mua. <sup>14</sup> Inau ku agutu heta bali hatia na taba, vaghagna ahai ke raghe veuehuhu. Inau kuda hatia nigua na taba kori

vido a God keda kilou i popo eigna inau ku voututunia a Kraiss.

<sup>15</sup> Ighita kati heta ghohi kori nida na voututuni, e toke gi nida na toatogha eidia na komi fata iraani keda nanaba vamua. Gi kotida boi toatogha vaghagu inau eigna na komi fata iraani, a God keda tatelia vanighamumu na toatogha ke jino. <sup>16</sup> Keana na fata ke nagho vano, iaani; ighita katida mono leghua na komi fata a God ke tatelia vanighita ghohi.

<sup>17</sup> Ara kulagu kiloau, oti leghua na komi fata ke toke ku eia, moti leghura mua arahai kena leghua na puhu kiti eia kori vido kiti mono duamiu. <sup>18</sup> Inau ku veleghamumu iaani eigna sethe na tinoni kena velea imarea kena voututunia a Kraiss, keana na puhidia ke dika. Ighita kati adoa imarea kena sokara pungusia na velepuhi eigna na thehegna a Kraiss kori ghaibabala. Sethe ghohi na maghavu inau ku veleghamumu eigna na komi fata iraani, mi ikeagaieni inau ku ghoi veleghamumu kori tangi ma na dikahehe. <sup>19</sup> Na komi tinoni vaghagna iangeni, a God keda vetulara vano kori meleha papara. Imarea kena leghua vamua na komi fata ke magnahaghinia na tonodia. Imarea kena boi maomamo eidia na komi fata ke dika kena eia, keana imarea kena tautalunagho eidia vamua. Imarea kena togha vamua na fatai maramagna. <sup>20</sup> Mati saghoi eia vaghagna iangeni, eigna na pukuni melehada ighita ke mono i popo. Ighita katida pitua a Vahavida, a Lod Jisas Kraiss, keda horu mai i popo. <sup>21</sup> Kori vido iangeni, imanea keda tughua na tonoda ke lae me thehe, kori tono

ke mathangani vaghagna na tonogna a Jisas ke mana. Imanea keda eia iaani kori mana ke mono itagna bali vunaghi pungusiragna na komi fata gougovu.

## 4

### *Pol Ke Haghore Heta Vanira Na Komi Tinoni Kiloau*

<sup>1</sup> Ara kulagu kiloau, oti leghua na komi fata ku veleghamu ghohi kori letasi iaani eigna kotida sokara ngasi tagna a Lod. Inau ku dothovighamu puala mu magnahaghinia kuda mai reghighamu. Inau ku totogo mu tautalunagho nigua puala eimiu ighamu.

<sup>2</sup> Keana roghamu rua na vaivine, a luodia ma Sintike, inau ku kaeghamu gi koroda vagovua na riurihu varihotaghimiu eigna roghamu na tinoni nigua a Lod. <sup>3</sup> Mi ghoe, pukuni kulagu kori nida na agutu vania a Lod, inau ku kaegho gi koda hathera e rua na vaivine iraani, eigna roira koro agutu haidu duagu kori tuturiagna na Rorongo ke Toke. Me boi roira vamua koro agutu duagu, keana a Klemen duadia kekeha mara mua. Mara iraani, na ahadia ke mono ghohi kori Buka i Havi.

<sup>4</sup> Oti totogo hahali eigna ighamu na tinoni nigua a Lod. Mu ghoi veleghamu mua, oti totogo.

<sup>5</sup> Oti eia na puhi ke toke vanira na komi tinoni gougovu eigna na tabiruagna mai a Lod ke gharani mai ghohi. <sup>6</sup> Saghoi lubatia na ghaghanamiu eigna keda horuhaihadi eigna sa fata. Kari oti tarai vamua eigna na komi fata ke katheghamu. Moti tarai kaea a God eigna na

hava koti magnahaghinia moti saghoi toghasania na veletokeagna. <sup>7</sup> Gi kotida eia iaani, na soleana nigna a God keda mono kori ghaghanamiu, eigna ighamu na tinoni nigna a Jisas Krai. Teo ahai ke tangomana na thaothadoghagna na soleana nigna a God.

<sup>8</sup> Ara kulagu kiloau, inau ku magnahaghinia kuda velehemu sina fata mua. Oti toatogha hahalia na komi fata iraani; na komi fata ke tutuni, na komi fata ke ghaghana bohera na komi tinoni, na komi fata ke jino, na komi fata ke raraha ma na komi fata na komi tinoni kena velea ke toke. <sup>9</sup> Oti leghua na komi fata ku velepueghamu ma na komi fata koti rongovia moti reghia itagua. Gi kotida eia iaani, a God, imanea ke heghita na soleana, keda mono duamiu.

### *Nigna Na Haghore Veletoke A Pol*

<sup>10</sup> Inau ku totogo puala mu veletokea a Lod eigna ighamu koti ghoi magnahaghinia mua na hatheugna. Inau ku adoa ighamu koti magnahaghinia na hatheugna hahali, kari e sethe ghohi na maghavu ke vahothonaghinighamu na eiagna sa fata vaniu. <sup>11</sup> Inau ku velehemu iaani, boi eigna ku magnahaghinia sa fata itamiu. E toke vamua gi keda teo sa nigua fata ba sethe, eigna inau ku adoa na puhi bali mono totogo hahali. <sup>12</sup> Kori vido ke teo sa nigua fata ba kori vido ke sethe nigua na fata, inau ku mono totogo vamua, eigna inau ku adoa ghohi na puhi bali mono totogo tagna na komi fata gougovu ke padau. Toke vamua kuda mahu ba rofo, ba nigua na fata

ke nabagu ba boi nabagu. <sup>13</sup> Hii! E toke vamua eigna a Krai ke hatheu me ke vahetau.

<sup>14</sup> Keana, e pukuni toke puala ighamu koti hatheu kori vido inau ku pada na vahotha ikeagaieni. <sup>15</sup> Ighamu na komi tinoni kiloau i Filipai, oti adoa ghohi teo sa tinoni kiloau mua ke hatheu kori vido inau ku kidi titiono a na Rorongo ke Toke vanighamu me ghieghilei jufu na dani ku taveti aua kori nimiu na provins i Masedonia. Ighamu vamua koti hatheu kori rongu. <sup>16</sup> Vaghagna mua, kori vido inau ku mono kori meleha i Tesalonika, e rua ghohi na vetulagna mai nimiu na dotho itagua. <sup>17</sup> Inau ku boi veleghamu iaani eigna kotida talu vetula maia na komi dotho. Teo, keana inau ku magnahaghinia gi a God keda vatokeghamu eigna na komi fata ke toke koti eia vaniu.

<sup>18</sup> E mai jufungiu ghohi nimiu na komi dotho koti vetula maia duagna a Epafroditus. Mi ikeagaieni e teo sa fata ke kudo itagua. Na komi nimiu na dotho ke vaghagna na havughaghi ke ghuba toetokegna tagna a God me vatotogoa. <sup>19</sup> A God ku maimanihihia, ke tonogna na komi fata gougovu. Ma na vunegna iaani, imanea keda heghamu na komi fata ke nabamiu, eigna ighamu nigna na komi tinoni a Jisas Krai. <sup>20</sup> Ati kilothaba a God a Tamada e hau me hau. Amen.

### *Na Vagovui Haghore*

<sup>21</sup> Hii, oti hera nigua na haghore dotho tadia na komi tinoni nigna a God ngengeni kena voututunia a Jisas Krai. Arahai kena voututuni kena agutu duagu eeni, imarea kena vetula atua



nidia na haghore dotho itamiu. <sup>22</sup> Ma na komi tinoni gougovu nigna a God kena mono eeni kena vetula atua nidia na haghore dotho itamiu, haluhadi arahai kena agutu kori vathegna na King gna i Rom.\*

<sup>23</sup> Inau ku tarai kaea a Lod Jisas Krais eigna keda vatokeghamu.

---

\* **4:22** “King gna i Rom” Reghia kori Diksonari

**Na Rorong Ke Toke Eigna a Jisas Krai  
The New Testament in the Bughotu language of the  
Solomon Islands  
Niu Testament long langguis Bughotu**

copyright © 2009 Wycliffe Bible Translators, Inc.

Language: Bughotu

Translation by: SITAG

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-11-13

---

PDF generated using Haiola and XeLaTeX on 11 Nov 2022 from source files dated 30 Nov 2021

ff048ce1-500f-52e4-9ba7-18fcd6abd5f1